

Excelentismos

- **Senhor Presidente Parlamento Nacional IV Legislatura Sesante**
Dr. Aniceto Longuinos Guterres Lopes,
- **Distinto Eis-Deputado/Deputada sira IV lezislatura nian,**
- **Senhor Primeiru Ministru no Membru VII Governu Konstitusional**
- **Distintos Deputado/Deputada sira V Lezislatura nian,**
- **Konvidadu no assistentes sira nebe presentes,**
- **Povo Timor Leste tomak nebe hau hanai no servi.**

Excelencias,

Honra bo'ot ida mai hau, ohin leron mai hamrik iha ita Boot sira nia oin hanesan Presidente Parlamento Nacional eleitu ba V Legislatura Parlamento Nacional nian. Presidente Parlamentu Nasional, tuir artigu 17º Regimentu Parlamentu Nasional, hanesan representante no portavos Parlamento Nacional atu preside no organiza deit sesaun sira. Presidente Parlamentu Nasional laiha plenus poderes tamba puder nee iha Distintus Deputado/a sira nia liman, tuir konstituisaun deputadu sira mak representa povu, laos Presidente Parlamentu, Presidente Parlamentu tuir Regimentu representa deputadu sira. Tamba nee, hau deklara ho firmeza ba Distintu Deputadu sira no povu Timor Leste tomak nebe ita representa katak, durante halao hau nia knar hanesan Presidente Parlamentu Nasional, hau sei halao no kumpri deit knar sira ne'ebe konsagra ona iha konstitusaun, leis no regimentu interna Parlamento Nasional nian ho firmeza, hodi servi nai Deputadu sira no povu Timor Leste tomak.

Timor-Leste nudar pais nebe tane as multi partidarismo, significa katak, partido hotu-hotu existe nudar patrimonio (*aset*) nasaun nian tantu hanesan partidu do governo ka iha opozisaun, iha knar hanesan atu servi povu no nasaun hodi lori povu ba moris diak. Durante kampanhe iha diverzencias politikas entre partidu ka koligasaun sira atu hetan votus hodi representa sira iha Parlamentu Nasional, atu defende povu nia interesse ho objetivu lori povu Timor Leste ba moris ida diak liu no seguru. Eleisaun hotu ona, rezultadu mos fo sai ona husi Tribunal Rekursu, tamba nee mak ita nain nenulu resin lima ohin halibur malu iha Uma Fukun Povu nian hola posse atu halao knar ida nee durante ita nia mandatu iha V Legislatura. Tamba nee, hau husu ba Distintos Deputadus sira atu haluha tia diverzencias politika sira nebe akontese durante kampanhe hodi fo liman ba balu atu servi povu no nasaun doben ida nee, liu husi ita nia knar halo lei, fiskalizaun no foti desizaun politika, nebe define iha artigu 92º konstituisaun RDTL. Knar hirak nee laos fasil, maibe laos mos difisil, se ita hotu tau interesse nacional as liu hau fiar no ita hotu fiar katak Parlamentu Nasional bele halo knar hirak nee ho diak no seguru hodi benifisia interesse nacional.

Iha Konstitusaun hateten mos katak Parlamento Nacional hari'i husi rezultadu eleisaun nebe normalmente hala'o kada tinan lima lima. Siklu politika ida nebe sai tradisaun iha pais demokratiko sira. Tamba ne'e Timor Leste nudar pais demokratiku mos lases husi tradisaun politika siklu tinan lima-lima ida ne'e.

V lezislatura Parlamento Nacional ida ne'e, mai husi rezultadu Eleisaun Antispada. Mesmu eleisaun antispada nee foin primeira vez realiza depois de restaura ita nia independência iha 20 de Maio 2002, maibe buat hotu lao ho diak, partisipasaun eleitores as tebes kompara ho eleisaun normal sira. Nee

hatudu katak ita nia povu nee iha matoridade politika ida as no prosesu demokratiku lao diak tebes iha nasaun doben ida nee. Hau lori ita hotu nia naran hatoo parabens ba povu Timor Leste no hein katak ita nain nenulu resin lima nee, bele fo liman ba malu hodi defende sira nia interesse no banati tuir saída mak povu hatudu durante prosesu eleisaun antisipada nee lao. Tuir no. 1 artigu 2º konstituisaun soberania nee povu nian, liu husi eleisaun povu delega soberania nee mai ita deputadu sira, atu representa sira hodi foti desizaun lori Povu nia naran tuir Konstitisaun RDTL.

Desde restorasaun Independensia Timor Leste hatudu ona nia komprimisu nudar pais demokratiku hodi tane as prinsipiu sira nebe define ihs Konstitusaun, Leis no Regulamento sira nebe sai matadalan ba prosesu tomak iha lala'ok hanesan estado de direitu demokratiku ida nian.

Distintu Deputados, no Povu Timor Leste tomak,

Parlamento Nacional nudar representate povo tenke hatudu duni katak instituisaun nee sei pro-ativu rekolha aspirasaun povu nian hodi hato'o ba'a governu. La'os ida ne'e deit maibe, iha mandato legislatura ida ne'e, Parlamento Nacional presiza mos dezenvolve relasaun institucional ne'ebe efektivu no konstrutivu entre orgaun estado sira bazeia ba prinsipio separasaun de poderes maibe iha interdependência ba malu.

Hanesan Institusaun estado, Parlamento Nacional tenke hadi'a an nafatin tuir evolusaun tempu no sirkunstansias desenvolvimento iha mudança global. Ita aprende nafatin hodi muda saida mak seidak diak bele sai diak liu

tan, atu nuneé bele ajuda hadia povu nebe ita representa nia moris iha situasaun ida nebe nakonu ho armonia no seguru.

Ita nian povo sempre hakmatek kuandu infrenta situasaun politika ida, tamba sira fiar katak situasaun politika sira nee bele ultrapassa ho diak tamba iha líder maximu partidu sira iha interesse nacional ida as, nebe la sei husik estadu nee monu ba krize ida naruk. Mesmu sira moris susar no defikuldade oioin maibe iha esperança katak loron ida sira sei hetan moris diak tamba fiar ba liderança sira no vizaun politika nebe lao dau-dauk. Maibe, hanesan ema povu mos iha mos limite, tamba nee prezisa foti solusaun ida lalais atu ultrapassa tia krize ida nee atu lori fila fali moris ida seguru no sustentabel ba povu atu povu recupera fali sira nia moris assegura konfiansa moris ba oin. Nai Deputadu sira mak hanesan representante povu mak halao knar tuir mandatu nebe iha atu assegura no fo konfiansa ba povu liu husi ninia knar iha Parlamento Nacional, rekolha aspirasaun povo nian no artikula ba politika estado nian, hodi bele servi no responde dificuldades iha realidade neébe povu hasoru, liu husi assegura governasaun ida seguru no estabil. Tamba tuir konstituisaun governu mak halo planu, parlamentu nacional aprova, Presidente da Republika promulga, governu ezejuta no parlamentu nacional fiscaliza.

Distintus Deputada no Deputadu no povu sira nebe hau servi

Parlamento Nacional mos atraves meios “*diplomacia parlamentar*” sei hametin liu tan kooperasaun ho entidade Internasional sira, tamba Timor-Leste nebe sai parte husi mundo globalizadu sei la-ses an husi mudança

mundial nebe transforma an ba bebeik. Ita konsiente katak, nasaun sira sempre iha dependencia ou interdependencia ba malu hodi hetan objectivu pais ida-idak nian.

Iha area kooperasaun nian, ita hare ba nivel balun nebe fo' o impaktu direita ba funcionamentu Parlamento Nacional nian. Ita presiza defini fali ita nia nesidades sira hodi hato' o ba ita nia parseirus desenvolvimentu, hodi nune evita sobre-pozisaun assistensia nian, liu-liu identifika area ne' ebe Parlamento Nacional sei persija liu-husi apoiu parseiru sira.

Ho meios "*diplomacia parlamentar*" hasa' e liu tan kooperasaun di' ak ho Uniaun Eropeia, IPU, AP-CPLP no UPF. Hametin mos ita nia kooperasaun bilateral ho Assembleia Republica Portugal no mos nasaun sira seluk através akordus no mos kontaktus ho embaxaida sira iha Timor-Leste.

Distintos deputados,

Prioridade Parlamentu Nasional ba agora mak, aprova programa VIII Governu, Orsamentu Geral do Estado ba 2018, atu nune bele tau fali estado Timor Leste moris ho orsamentu anual ida hodi assegura dezvoltimentu no sustentabilidade estado RDTL nian no sai tiha husi regime dua decimal nebe lao ona durante fulan nen laran nee. Parlamentu Nasional mos Presiza aprova lei prioridades sira, reve lezislasaun sira ne' ebe relevante ho interesse nacional, katak Parlamento Nacional nia servisu atu tau matan ba implementasaun programas governo nian ne' ebe fo benefisiu ba povu nia

moris di'ak, hodi transforma ka eleva vida sosial ekonomiku iha nível agora ba situasaun moris povu nian ida diak liu iha oin mai.

Tamba ne'e, komesa ohin, ita, Deputados Parlamento Nacional presiza servisu ho espiritu atu servi povu no nasaun hanesan orgaun kolezial hodi tau interesse nasional as liu interese pessoal ka grupu nian.

Eselencias

Molok atu taka.

Iha Momentu furak ida ne hakarak elozia povu Timor Leste tomak iha rai laran ka iha estrangeiru nebe maka hatudu maturidade politika nebe tasak iha período kampanhe ba eleisaun parlamentar antisipda no mos exerse ho di'ak direitu politika hodi ba vota iha loron Eleisaun Antesipada 12 de Maio 2018 ho taxa partisipasaun nebe as.

Aproveita mos biban ida ne atu hato'o agradesimentu no honra bot ba Senhor Deputado Aniceto Longinos Guterres Lopes, hanesan Presidente Parlamento Nacional, membro meja Parlamento Nacional no deputados IV lezilatura nebe desempenha knar ho korazem durante IV Legislatura no dedikasaun as.

Iha oportunidade ida neé hakarak hatoó mos agradesimentu bot ba Primeiro Ministro DR. Mari Bin Hamudi Alkatiri no membro VII Governu Konstitusional, ho limites oioin konsege halo preparativos no hala'o Eleisaun Antesipada 12 de Miao 2018, nebe organiza husi instituisaun STAE, supervisona husi CNE no observadores internacionais ho nasionais lao diak no susesu tebes.

Hatoo mos agradesimentu ba Polisina Nasional Timor Leste (PNTL) no FALENTIL-Forsa Defeza Timor Leste (F-FDTL) ba sira ninia dedikasaun no profesialismu hodi garante eleisaun antisipada nee lao ho diak, mesmu iha defikuldades oioin tamba limite orsamentu no facilidades maibe hotu lao ho diak.

La-haluha mos hau nia agradesemento ba liderança Maximo AMP especialmente MB Kay Rala Xanana Gusmao, Maun Taur Matan Ruak Bou Naimori nebe depozida konfiansa tomak mai atan hau nia candidatura no eleitu atu lidera Parlamento Nacional V Lezislatura. “Ita Boot sira nia konfiansa, mak sai hau nia kompromisu” Hau nia Kompromisu mak, hau sei halao deit hau nia knar tuir Konstituisaun no lei sira nebe vigora.

Povu hein hela ita hotu nia asaun konkreta hodi servi sira ho diak liu tan.

Obrigadu barak.

Dili, 13 de Junho 2018

Prezidente Parlamentu Nasional,

Arao No’e de Jesus da Costa Amaral